

10/09/2002

Kebebasan mutlak boleh cetus kekacauan, rusuhan

KUALA LUMPUR, Isnin - Kebebasan mutlak boleh menimbulkan kekacauan dan rusuhan sehingga menyebabkan kemiskinan dan kesusahan kepada rakyat, kata Datuk Seri Dr Mahathir Mohamad.

Sambil menegaskan kebebasan mutlak tidak mungkin wujud, Perdana Menteri berkata sejarah telah mengajar bahawa kekacauan dan rusuhan menyebabkan taraf hidup rendah, kemiskinan dan kesusahan kepada rakyat.

Katanya, kecuali kerajaan menentukan had terhadap hak tertentu, individu boleh menyalahgunakan kebebasan serta mencetuskan keruntuhan moral seperti membunuh bayi dalam kandungan dan kanak-kanak.

"Oleh itu, hak sebenar perlu dilihat dalam konteks lebih luas yang meliputi kualiti kehidupan masyarakat dan bukan terhad kepada idea Deklarasi Hak Asasi Manusia Sejagat 1948 yang Pertubuhan Bangsa-bangsa Bersatu (PBB) sendiri gagal melaksanakannya.

"Konsep Barat mengenai hak, berbeza dengan Asia. Barat meletakkan hak individu mengatasi kepentingan kumpulan atau masyarakat sedangkan budaya Asia meletakkan masyarakat mengatasi segala-galanya," katanya.

Beliau berkata demikian dalam ucapan perasmian Persidangan Mengenai Hak Asasi Manusia dan Pendidikan anjuran Suruhanjaya Hak Asasi Manusia (Suhakam) di Pusat Dagangan Dunia Putra (PWTC), hari ini. Teks ucapannya dibacakan oleh Menteri di Jabatan Perdana Menteri Datuk Seri Dr Rais Yatim.

Hadir sama ialah Pengerusi Suhakam, Tan Sri Abu Talib Othman dan bekas Pengerusi pertama Suhakam, Tan Sri Musa Hitam.

Dr Mahathir menegaskan, undang-undang yang dikutuk Barat seperti Akta Keselamatan Dalam Negeri (ISA) perlu untuk melindungi negara dan memberi perlindungan kepada majoriti rakyat.

Katanya, ketidakstabilan politik, kekurangan jaminan keselamatan dan ancaman kepada keselamatan seseorang, bukan saja akan menakutkan pelabur malah akan mengurangkan produktiviti.

"Berapa ramai daripada kita memilih untuk tinggal di negara yang dilanda konflik dalaman dan keganasan berbanding mereka yang memilih keharmonian dan keadaan selamat.

"Penyokong hak asasi manusia mahukan hak asasi yang tidak berbelah bagi. Namakan saya sebuah negara yang mampu meneruskan standard kehidupan mapan tanpa menguatkuasakan undang-undang dan ketenteraman," katanya.

Beliau berkata, ketika beberapa pihak mungkin mentafsirkan Perlembagaan Persekutuan secara berbeza, beberapa asas kebebasan termaktub dalam bahagian II Perlembagaan seperti hak rakyat untuk menyaman kerajaan dan hak untuk mengundi selain undang-undang biasa yang memberi perlindungan hak asasi seperti Akta Orang Asli dan Akta Pekerjaan.

Malah, berbanding negara lain, Malaysia masih ke depan dalam melindungi hak asasi dan menjadi negara ketiga menubuhkan Suruhanjaya Hak Asasi Manusia di kalangan negara Asean lain.

Perdana Menteri berkata, sejak Merdeka, banyak pencapaian dibuat dalam pelbagai bidang seperti kesihatan, pendidikan, pembasmian kemiskinan dan pembangunan sumber manusia.

Rawatan kesihatan Malaysia, terutama rawatan ibu dan kanak-kanak adalah antara yang terbaik di dunia. Pada 1999, kadar kematian bayi adalah lapan peratus bagi setiap 1,000 dan bagi kanak-kanak berumur antara satu dan empat tahun, kadar kematian hanya 0.4 peratus manakala pada Ogos 2000, Malaysia diisytiharkan bebas daripada penyakit polio.

Dr Mahathir berkata, lebih 2.9 juta atau 99.9 peratus kanak-kanak berumur tujuh tahun di negara ini bersekolah, manakala kanak-kanak perempuan mendapat hak yang sama dalam bidang pendidikan yang mewakili 49 peratus daripada murid sekolah rendah.

Malah, mulai tahun depan, semua kanak-kanak yang mencapai usia persekolahan, diwajibkan mengikuti pendidikan sekolah rendah.

Kerajaan juga mengambil langkah ke depan dalam memastikan semua kanak-kanak prasekolah mendapat akses kepada pendidikan prasekolah berkualiti dengan menetapkan semua tadika, sama ada milik kerajaan, swasta atau separuh kerajaan, menggunakan kurikulum prasekolah kebangsaan yang digubal untuk membantu kanak-kanak menguasai kemahiran bagi menyediakan mereka dengan pendidikan formal tahun satu, mulai tahun depan.

Beliau berkata, bagi meningkatkan akses serta memperbaiki pencapaian kanak-kanak di luar bandar, terutama mereka di pedalaman Sabah dan Sarawak, lebih banyak sekolah berpusat akan didirikan di kawasan terpencil.

Usaha juga akan dilakukan untuk memastikan guru serta bahan pengajaran, infrastruktur serta guru terlatih mencukupi di kawasan luar bandar.

Dr Mahathir berkata kurikulum latihan guru juga akan dikaji semula, tidak saja menekankan penggunaan teknologi maklumat dan komunikasi (ICT), malah menekankan kepada pentingnya nilai etika dan moral.

"Suhakam boleh bekerja dengan Kementerian Pendidikan dan Kementerian Sumber Manusia untuk mencapai matlamat mewujudkan budaya prihatin. Semoga jalinan usaha sama pintar antara Suhakam dan kedua-dua kementerian ini akan terhasil melalui persidangan ini," katanya.

Perdana Menteri berkata, kerajaan bukan setakat menandatangani, malah mengesahkan Konvensyen mengenai Hak Kanak-kanak dan berusaha mematuhi artikel itu dengan menetapkan setiap projek perumahan memperuntukkan kawasan untuk taman kanak-kanak, kemudahan awam untuk kegiatan luar keluarga, dua Sabtu sebulan sebagai hari tidak bekerja dalam perkhidmatan awam dan membina perpustakaan.

"Ibu bapa juga diberi kebebasan memilih aktiviti kebudayaan untuk disertai anak mereka. Malangnya, ramai ibu bapa menganggap rekreasi dan bersantai tidak bermanfaat untuk anak-anak mereka," katanya.

Mengenai kemiskinan, Perdana Menteri berkata kerajaan mensasarkan untuk mengurangkan masalah itu dengan menangani kemiskinan terpencil, terutama dalam kumpulan minoriti di kawasan pedalaman.

"Kerajaan akan terus melaksanakan komitmennya membina rumah kos rendah dan sederhana bagi meningkatkan kualiti udara dan air, pengurusan sisa buangan yang cekap, pembangunan alam sekitar perbandaran yang sihat dan pemuliharaan habitat dan sumber alam semula jadi yang kritikal," katanya.

Dr Mahathir berkata kerajaan mahu rakyat gembira dan menikmati standard kehidupan yang mencukupi.

"Dalam pada setiap individu wajar mengetahui hak masing-masing, setiap orang juga perlu sedar mengenai hak orang lain dan negara serta menghormati hak mereka," katanya.